

Акафист святителю Тихону Воронежскому, Задонскому Чудотворцу

Память празднуем 26 (13) августа

Кондак 1

Избранный угодниче Христов, Святителю отче Тихоне, возсиявый миру, яко светозарное светило, прославляюще прославльшаго тя Господа, даровавшаго нам в тебе новаго великаго молитвенника и помощника, скорого недугов душевных же и телесных целителя, похвальное воспеваем ти пение: ты же. имеяй велие дерзновение к Владычице небесе и земли, от всяких нас бед свободы зовущих:

Радуйся, Тихоне, великий и преславный Чудотворче.

Икос 1

Ангелов собеседниче и человеков наставниче, ныне, яко Божий служитель, предстоя с вышними лики, Святителю Тихоне, молиши о всех нас Христа Бога нашего и к ведению спасения ны руководиши. Сего ради благодарне во умилении вопием ти:

Радуйся, пречестное Святыя Троицы селение; радуйся, чистотою и святынею Ангелом уподобление. Радуйся, светильниче Божественнаго света; радуйся, всесветлое благодати приятелище. Радуйся, присный пред Господем наш заступниче; радуйся, теплый пред Ним о нас молитвенниче. Радуйся, скорый в нуждах и скорбех сущим помощниче; радуйся, добрый душ

наших наставниче. Радуйся, Церкви православный утверждение; радуйся, всея земли Российския светлое озарение. Радуйся, Воронежския паствы похвало; радуйся, обители Задонския украшение.

Радуйся, Тихоне, великий и преславный Чудотворче.

Кондак 2

Видя в творениих, аки в зеркале, премудрость и славу Творца всяческих Бога, к Нему духом выну возносился еси, богомудре: светом же благоразумия твоего и нас озари, да вопием купно с тобою: Аллилуия.

Икос 2

Разум твой божественными ученми просветил еси, богомудре Тихоне, отвергнув всяко плотское мудрование, с разумом же и волю повинул еси Господеви: тем же сосуд чист и селение Духу истины явился еси. Сего ради, яко богомудраго наставника, тя ублажающе, воспеваем сице:

Радуйся, Божия премудрости созерцателю и проповедниче; радуйся, яко от тленного мира духовное сокровище, услаждающее души верных, собрал еси. Радуйся, истиннаго благословия златословесный учителю; радуйся, яко уста Христовы, источающа словеса жизни вечныя, был еси. Радуйся, закона Божия от всея души твоей взыскавый; радуйся, свидений и оправданий Господних возжадавый. Радуйся, яко к небеси ведущими стезями невозвратно шел еси; радуйся, яко на высоту добродетелей возшел еси. Радуйся, яко мысленным

оком к невечернему свету — Христову выну взирал еси; радуйся, яко видения пренебеснаго света сподобился еси. Радуйся, Божия разума исполненный; радуйся, благодатию Духа Святаго приосененный.

Радуйся, Тихоне, великий и преславный Чудотворче.

Кондак 3

Сила Вышняго чудесно спасе тя от напрасныя смерти и яве показа тя сына Царствия Христова суца, Святителю отче Тихоне, егда, во всю ночь пребывающу ти в благомыслии, внезапно небеса отверзошася и явился свет неизреченный. И тако премирныя радости исполнився, возопил еси Богу: Аллилуия.

Икос 3

Имея веру несумненну и помысл чист, вся красная мира сего презрел еси, Тихоне блаженне, и в образе Ангельстем неленостно послужил еси Господу Богу: тем же, аки звезда путеводная, светиши всем, хотящим жити в преподобии и вопиющим тебе:

Радуйся, житию безплотных поревновавый; радуйся, подвигом древних святых отец подражавый. Радуйся, яко приим крест, Христу последовал еси; радуйся, яко образ страстей Его в сердце твоём преднаписал еси. Радуйся, яко вся козни диавола силою креста Господня разрушил еси; радуйся, яко похотения греховная молитвою и терпением победил еси. Радуйся, яко угождал еси Господу всяким благоугождением; радуйся, преукрашенная храмино

добродетелей. Радуйся, красото смиренномудрия и воздержания; радуйся, образе кротости и послушания. Радуйся, постников веселие и иноков похвало; радуйся, болий в лике преподобных.

Радуйся, Тихоне, великий и преславный Чудотворче.

Кондак 4

Бурю внутрь имея помышлений, недоумеваше раб Божий, что речет о нем Господь, егда людие проразумеваху его достойна быти святительства: обаче всего себе Христу Богу предаде. Тому о всех благодарение возсылая, зовый: Аллилуия.

Икос 4

Слышавше людие о благоплодных добротах души твоея, Богоносне Тихоне, желанием вожделеша тя видети на степени святительства. Егда же собор Архиереев недоумеваше вдати тебе жезл пастырства, зане юн был еси, абие трикраты свыше свидетельствован еси, яко достойный сосуд Божественная благодати, вся немощная врачующия и оскудевающая восполняющий. Тем же, дивящеся чудному промыслению Бога о тебе, приносим ти сицевая благохваления:

Радуйся, Архиерею, от Самого Господа пронареченный; радуйся, мужу желаний, пасти стадо Христово свыше избранный. Радуйся, Пастыреначальника Иисуса благоволение; радуйся, иерархов украшение. Радуйся, яко от утра жизни твоея на стражбу словеснаго стада избран был еси; радуйся, яко и до вечера жития твоего сущия в вере

неленостно назидал еси. Радуйся, пастырю добрый, яко готов был еси душу твою положить за овцы своя; радуйся, многосветлый Церкви светильниче. Радуйся, Апостолов сопричастниче; радуйся, великих святителей сопрестольниче. Радуйся, яко первопрестольнику паствы твоея, Митрофану освященному, равночестен показался еси; радуйся, яко преемником твоим верный ко спасению путеводитель соделался еси.

Радуйся, Тихоне, великий и преславный Чудотворче.

Кондак 5

Боготечная звезда явился еси всем христианом, Святителю отче Тихоне: деянии бо и ученими твоими не точию во дни живота твоего добре назидал еси паству твою, но и по честнем успении твоём всем верным показуеши правы стези Царствия Христова, и научаеши присно взывати к Богу: Аллилуия.

Икос 5

Видя себе поставлена на степени архиерейства, Святителю отче наш Тихоне, не дал еси сна очам твоим, ниже веждом дремания, поставляя пастве твоей пастыри смысленны и вся люди управляя ко спасению. Мы же, ведуще тя быти пастыреначальника богомудренна и строителя дому Божия добра, взываем к тебе:

Радуйся, крепкое кормило Христовы Церкви; радуйся, нивы Господни удобрение. Радуйся, верных надежное утверждение; радуйся, неверных богомудренное обличение. Радуйся, Христова

вертограда делателю неусыпный; радуйся, душетленному зверю стадо твое расхищати не попустивый. Радуйся, храмов благолепия рачителю; радуйся, верный тайн святых строителю. Радуйся, яко стражей дому Божия на стражбу недремленну уготовал еси; радуйся, яко пастырем проповедати благовременне и безвременне заповедал еси. Радуйся, благий и верный рабе Божий; радуйся, яко вшел еси в радость Господа твоего.

Радуйся, Тихоне, великий и преславный Чудотворче.

Кондак 6

Проповедник воистину благочестия явился еси, Святителю отче наш Тихоне, егда увидев безстудное празднество во граде твоём, яко добр воин Христов, притекл еси на игрище бесовское и словом вразумил еси заблуждшия, научая всех взывати Единому Истинному Богу: Аллилуия.

Икос 6

Воссиял еси, яко звезда лучезарная, Воронежской пастве, блистанием учений твоих озаряя души верных и разгоняя тму нечестия и суеверия. И ныне сладостию писаний твоих насыщаеши вся алчущия и жаждущия правды, иже благодарне и взывают к тебе:

Радуйся, наставниче всех к небеси направляяй; радуйся, проповедниче покаяния, заблуждших к исправлению воззываяй. Радуйся, славы Божия истинный ревнителю; радуйся, страннаго суеверия потребителю. Радуйся, яко душетленные обычаи обличил еси; радуйся, яко безстудное игрище

упразднил еси. Радуйся, имже сатана посрамися; радуйся, имже Христос прославися. Радуйся, яко и по смерти твоей души верных назидаети в благочестии сладостию писаний твоих; радуйся, яко в них сокровище, драгоценнейшее злата и сребра, нам оставил еси. Радуйся, златоусте Российския Церкви; радуйся, паствы твоей присное радование.

Радуйся, Тихоне, великий и преславный Чудотворче.

Кондак 7

Хотяй невозбранно возноситься духом в горняя селения, благодатишии пустыни возлюбил еси, Богоносе отче Тихоне, и тамо вселився, сподобился еси видети Господа, от иконы, аки от Голгофы, к тебе грядуща, вопия к Нему: Аллилуия.

Икос 7

Новым подвигом духовным вдал еси себе, Богоносе отче Тихоне, егда всесовершительнаго Духа благодать призва ты служити Господеви в безмолвии: имый бо помысл превыше мира, возлюбил еси смирение глубокое и молитвы непрестанныя. Сего ради и крепость духовную подаде тебе Подвигоположник Христос и сподоби ты видений благодатных, да и мы, введуще таковая, ублажаем тя:

Радуйся, любителю безмолвия, духом твоим в вышних обитавай; радуйся, самоотвержение всецелое показавый. Радуйся, во бдениих и молитвах неослабно пребывавал еси; радуйся, безстрастие умерщвлением страстей твоих стяжал еси. Радуйся, Господа распятаго на кресте выну пред собою

предзревый; радуйся, и телесныма очима видети Христа Иисуса сподобивыйся. Радуйся, яко пречистым стопам Его поклонился еси; радуйся, яко спасительныя язвы Его облобызал еси. Радуйся, исполнь веселия, егда явился тебе Богоматерь купно со Апостолы; радуйся, яко в славословии ликовствовал еси со Ангелы. Радуйся, таинниче Божий, еще на земли вкусивый небесных благ; радуйся, ангеле земный и человеке небесный.

Радуйся, Тихоне, великий и преславный Чудотворче.

Кондак 8

Странно и велико незлобие показа, преблаженный, егда един буй и злонравный удари его в ланиту; он же, Агнцу Христу поревновав, до земли поклонися биящему, моля Бога о прощении ему. Тем же дивящися незлобию его, поем Богу: Аллилуия.

Икос 8

Весь исполнь любви Христовы, Тихоне благосерде, душу твою полагал еси за други твоя, и аки Ангел Хранитель присущ был еси ближним же и дальным, озлобленныя укрощая, враждующия примиряя, и спасение всем устрояя. Сего ради чтим святую память твою и усердно вопием ти:

Радуйся, проповедниче любви, еуже Бог примири Себе человеки; радуйся, отче благосердый, взыскавый спасения многих. Радуйся, смирения и незлобия учителю; радуйся, терпения и миролюбия наставниче. Радуйся, яко за правду претерпел еси заушение; радуйся, яко за враги твоя умолял еси

Господа. Радуйся, егоже любовь победи всяку вражду; радуйся, егоже незлобие покори буяя сердца. Радуйся, миротворче благословенный; радуйся, мзду миротворцев наследивый. Радуйся, научивый заповедем Христовым и сотворивый я; радуйся, великий в Царствии Небеснем.

Радуйся, Тихоне, великий и преславный Чудотворче.

Кондак 9

Всем был еси вся, якоже и святой Павел, да всяко некия спасеши, Богомудре: сразсуждая бо немощному естеству человеческому, не укорил еси брата твоего, неподобающия посту снеди ядуща, но абие седши купно с другом его, от трапезы тоя мало вкусил еси. Поминающе убо таковое благоснисхождение твое, вопием к прославльшемуся в тебе человеколюбцу Богу: Аллилуия.

Икос 9

Ветии многовещанная не возмогут по достойнию изрещи твоих благодеяний множество, Святителю отче Тихоне: щедродательная бо десница твоя всюду досязаше. Мы же, благосердию твоему подражати хотяще, во удивлении взываем к тебе:

Радуйся, лучу любви Божия; радуйся, сокровище милосердия Спасова неистощимое. Радуйся, ближняя твоя паче себе возлюбивый; радуйся, в меньших братиях твоих самого Христа видеваемый. Радуйся, яко нищия поминая, хлеб твой слешами орошал еси; радуйся, яко питие твое плачем о них растворял еси. Радуйся, яко имения твоя неимущим расточал еси;

радуйся, яко щедродательная десница твоя николиже оскуде. Радуйся, яко больныя и в темнице заключенныя посещал еси; радуйся, яко нужды бедных предварял еси. Радуйся, словом и примером затворенныя на благостыню сердца отверзавый; радуйся, милостивых блаженство от Господа стяжавый.

Радуйся, Тихоне, великий и преславный Чудотворче.

Кондак 10

Спаستися всем хотяй преблагий Господь яви тя, Святителю отче наш Тихоне, образ жития праведнаго: кто бо не умилился, видя твое безмерное ко всем благосердие. Тем же велию к нам милость Божию славяще, вопием: Аллилуия.

Икос 10

Стена был еси помощи и заступления всем беспомощным и нападствуемым, Святителю Тихоне, и милосердия неистощимое сокровище. Сего ради славяще Бога, дивнаго во Святых Своих, и тя ублажаем:

Радуйся, безкровных пристанище; радуйся, всех беспомощных скорый помощниче. Радуйся, сирых питателю и призрение; радуйся, скудных земледельцев снабдение. Радуйся, скорбящим прибежище; радуйся, печальным утешение. Радуйся, обидимым заступление; радуйся, обидящих вразумление. Радуйся, угнетенным защитниче; радуйся, сильным мира сего небоязненный Суда Божия провозвестниче. Радуйся, яко за правду

претерпел еси скорби; радуйся, яко стяжал еси блаженство гонимых ради правды.

Радуйся, Тихоне, великий и преславный Чудотворче.

Кондак 11

Пение у гроба твоего угодниче Божий, Святителю отче Тихоне, не умолче от дне блаженнаго успения до дне светлаго прославления твоего: мнози бо ведаху тя богоносна и равноангельна суца. Ныне же вся Российская земля благодарно вопиет прославльшему тя Богу: Аллилуия.

Икос 11

Светило быв, вся концы земли Российския озарил еси, Святителю приснопамятне. Егда же приспе время отшествия твоего, Божественнии Ангели прияша святую душу твою и в небесныя обители вознесоша; тело же твое честное Троица вседетельная содела нетленно и источник чудес показа на утверждение православныя веры, на обличение же неверия и суеверия. Тем же, поминающе блаженное успение и велие твое на небеси и на земли прославление, с радостию приносим ти благохваления сия:

Радуйся, великий угодниче Божий, течение благочестне скончавый; радуйся, веру, надежду и любви до конца сохранивый. Радуйся, по трудех странствия земнаго сладце в селениих небесных почивый; радуйся, яко смерть приявый, тления же не познавый. Радуйся, со Христом, Егоже возлюбил еси, на веки соединивыйся; радуйся, Царствия Небеснаго

и славы вечныя наследниче. Радуйся, яко нетлением мощей твоих спасительную силу воскресения Христова являеши; радуйся, яко оным зарю общаго воскресения нам показуеши. Радуйся, истины православия несомненное уверение; радуйся, в Церкви присущия благодати неложное извещение. Радуйся, земнаго отечества твоего новое светило и утверждение; радуйся, царства православнаго покрове и защищение.

Радуйся, Тихоне, великий и преславный Чудотворче.

Кондак 12

Благодать чудес многообразных, вселився в небеси, приял еси от Господа, преблаженне Тихоне. Сего ради подаеши исцеления всем, притекающим к тебе с верою. Мы же, дивящися в тебе всемогуществу и благодати Бога, вопием Ему: Аллилуия.

Икос 12

Поюще дивное прославление святаго телесе твоего, видим тя, богоблаженне Святителю Тихоне, присно zde источающа потоки чудес, и в удивлении восхваляюще тя, зовем:

Радуйся, живоносный источниче, благодать исцелений изливающий нам от всечестныя раки твоея; радуйся, всех одержимых недуги непостыдное прибежище. Радуйся, слепых прозрение; радуйся, немых ясное глаголение. Радуйся, яко от одра разслабленныя воздвизаеши; радуйся, яко стужаемыя от бесов свобождаеши. Радуйся, сухорукия и сляченныя к деланию исправляяй; радуйся,

хромым и ничащим хождение подавая. Радуйся, телес наших благосострадательный врачу и хранение; радуйся, и душ наших к Царствию Небесному возведение. Радуйся, емуже сорадуются Ангели и о немже веселятся человецы; радуйся, имже Бог дивен во Святых Своих является.

Радуйся, Тихоне, великий и преславный Чудотворче.

Кондак 13

О великий и преславный Чудотворче, Святителю Христов отче Тихоне, прими сие похвальное пение от нас недостойных во умилении тебе приносимое, и твоим теплым предстательством у престола Божия испроси нам утверждение в вере и добрых делах, избавление от всех бед и напастей в жизни сей, в смертном же успении нашем благу надежду спасения, да сподобимся в радости вечней воспевати дивному во Святых Богу: Аллилуия.

(Этот кондак читается трижды, затем икос 1 и кондак 1)

Икос 1

Ангелов собеседниче и человеков наставниче, ныне, яко Божий служитель, предстоя с вышними лики, Святителю Тихоне, молиши о всех нас Христа Бога нашего и к ведению спасения ны руководиши. Сего ради благодарне во умилении вопием ти:

Радуйся, пречестное Святыя Троицы селение; радуйся, чистотою и святынею Ангелом уподобление. Радуйся, светильниче Божественнаго света; радуйся, всесветлое благодати приятелище. Радуйся, присный пред Господем наш заступниче; радуйся, теплый пред

Ним о нас молитвенниче. Радуйся, скорый в нуждах и скорбех сущим помощниче; радуйся, добрый душ наших наставниче. Радуйся, Церкви православный утверждение; радуйся, всея земли Российския светлое озарение. Радуйся, Воронежския паствы похвало; радуйся, обители Задонския украшение.

Радуйся, Тихоне, великий и преславный Чудотворче.

Кондак 1

Избранный угодниче Христов, Святителю отче Тихоне, возсиявый миру, яко светозарное светило, прославляюще прославльшаго тя Господа, даровавшаго нам в тебе новаго великаго молитвенника и помощника, скорого недугов душевных же и телесных целителя, похвальное воспеваем ти пение: ты же. имеяй велие дерзновение к Владычице небесе и земли, от всяких нас бед свободи зовущих:

Радуйся, Тихоне, великий и преславный Чудотворче.

Молитва

О всехвальный святителю и угодниче Христов, отче наш Тихоне! Ангельски на земли пожив, ты яко ангел благий явился еси и в дивнем твоём прославлении: веруем от всея души и помышления, яко ты, благосердый наш помощниче и молитвенниче, твоими неложными ходатайствы и благодатию, от Господа обильно тебе дарованною, присно способствуеши нашему спасению: приими убо, убажжаемый угодниче Христов, и в час сей наша

недостойная моления: свободи ны твоим заступлением от облегающего нас суесловия и суемудрия, неправоверия и зловерия человеческого: потщися, скорый о нас предстателю, благоприятным твоим ходатайством умолити Господа, да пробавит Своя великия и богатыя милости на нас грешных и недостойных рабех Своих, да уврачует Своею благодатию неисцельныя язвы и струпы растленных душ и телес наших, да растворит окаменелая сердца наша слезами умиления и сокрушения о премногих согрешениих наших, и да избавит ны от вечных мук и огня геенскаго: всем же верным людям Своим да дарует в нынешнем веце мир и тишину, здравие и спасение и во всем благое поспешение, да тако, тихое и безмолвное житие поживше во всяком благочестии и чистоте, сподобимся со ангелы и со всеми святыми славити и воспевати всесвятое имя Отца и Сына и Святаго Духа во веки веков.